

Bryn Mawr College

## Scholarship, Research, and Creative Work at Bryn Mawr College

---

Hermann Sauppe Library

Bryn Mawr College Publications, Special  
Collections, Digitized Books

---

1857

### De Taciti Germania disputatio

Friedrich Münscherr

Follow this and additional works at: <https://repository.brynmawr.edu/digitizedbooks>  
[Let us know how access to this document benefits you.](#)

---

#### Citation

Münscher, Friedrich. 1857. De Taciti Germania disputatio. PhD Diss., Philipps-Universität Marburg.

This paper is posted at Scholarship, Research, and Creative Work at Bryn Mawr College.  
<https://repository.brynmawr.edu/digitizedbooks/121>

For more information, please contact [repository@brynmawr.edu](mailto:repository@brynmawr.edu).

878T  
V. Müns  
9

**FRATRI CONIUNCTISSIMO CARISSIMO**

**GUILLIELMO PHILIPPO MUENSCHER**

**GYMNASII QUOD EST APUD HERSFELDENSES DIRECTORI**

**SOLEMNIA**

**OB MUNUS DIRECTORIS PER HOS QUINQUE ET VIGINTI ANNOS**

**FELICITER BENEQUE GESTUM**

**PRIDIE CALENDAS NOVEMBRES ANNI MDCCCLVII**

**RITE CELEBRANDA**

**PIO LAETOQUE ANIMO**

**GRATULATUR**

**Dr. FRIDERICUS MUENSCHER**

**GYMNASII QUOD EST APUD MARBURGENSES DIRECTOR.**



**M A R B U R G I.**

**TYPIS ELWERTI TYPOGRAPHI ACADEMICI.**

**MDCCCLVII.**



**R**epetenti mihi, carissime frater, aetatis tecum peractae memoriam saepenumero in mentem venit et illud tempus, quum in coenobio illo, quod in civitate Marburgensium exstructum a cucullatis vitae communis fratribus „Kugelhof“ nomen traxit, frater fratrem literarum latinarum initiis puerum me instituisti, et illud, quum gymnasii, quod est apud Hersfeldenses, praeceptor atque collaborator mihi eiusdem scholae alumno auctor atque dux fuisti Taciti et legendi et diligendi. Quam ob rem, postquam consilium mihi fuit, ut munere quodam, quantumcunque esset, offerendo conditum quintum gymnasii prospere gubernati lustrum tibi gratularer, nihil habui te dignius, quo laetum gratumque animum significarem, quam hanc de Taciti Germania scriptionem. Ita enim et fraternae inter nos caritatis studiorumque societatis, et communis in patriam pietatis simul renovatur recordatio. Hoc igitur familiare quoddam opusculum boni quaeso consulas, et, si in scriptione mea multa videantur desiderari, at animi tamen benevolentiam in me quam maximam esse, certum comprobatumque habeas.

---

Propositum autem mihi est ita de Taciti Germania disputare, ut primum, *qua ratione in scribendo libro ille usus sit, quaeratur, deinde paucae in difficiliore quosdam illius libri locos observationes addantur.*

Iam igitur videamus, quam in scribendo Tacitus rationem secutus sit, qua arte librum disposuerit. Qua de re quum Ludovicus Doederlein, vir de

literis et Graecis et Latinis optime meritis, in editione Taciti (Tom. II. pag. 8.) non plura attulerit, quam quibus Ludenii illius rerum Germanicarum scriptoris de Taciti Germania opinionem refutaret, magnam nobis fecit et potestatem et voluntatem uberius rem tractandi.

Omnem de Germania librum, id quod inter omnes constat, Tacitus in duas divisit partes, quarum altera de universa Germanorum gente, altera de singulis nationibus ageret. In priore autem parte, antequam ad ipsam rem accederet, de situ terrae et hominum origine paucis praefatus est, quae inde a primo capite usque ad quinti finem leguntur. Quo velut fundamento iacto de universae gentis moribus exponere et prius quidem de publicis, deinde de privatis Germanorum rebus scribere coepit.

Initium autem ita facit, ut terram Germanorum circumscribat terminis. Neque tamen notionem geographicam, quam vocant, apud eum tantum valuisse, ut veram Germanorum indolem negligeret, quum ex aliis multis, tum inde apparet, quod in altero et in iis, quae sequuntur, capitibus exponit, non deesse quidem, qui Herculem, Ulyssem, alios in Germaniam venisse censeant, sibi vero Germanos videri indigenas esse, cum aliis gentibus minime commixtos. Confirmat autem hanc de sincera Germanorum indole sententiam iis, quae in capite duodetricesimo de Avarischorum Osorumque sermone, institutis, moribus a Germanorum gente alienis leguntur. Itaque Tacitus, quamquam parum accurate spectantibus nobis videtur notionem, quam de Germanis habeat, non aliunde percepisse, nisi ex terrae situ finibusque, tamen re vera optime facit cum Arndtio nostro, qui praeclarum illud composuit: Was ist des Deutschen Vaterland? — Germanos enim Tacitus eos esse censet, qui non magis sedibus et finibus, quam indole, sermone, institutis, moribus secernantur ab aliis gentibus.

Tum exordii finem ita facit scriptor, ut de soli coelique specie atque de iis, quae apud Germanos gignuntur, paucis exponat. In quibus quum de ferro mentionem facit, aptissimam sibi parat transitionem ad arma remque bellicam exponendam, quod vitae morumque genus necessitudine quadam cum ferro coniunctum est.

Cur in moribus Germanorum describendis Tacitus primum armorum atque pugnandi bellandique rationem habuerit, nemini potest esse dubium, qui reputaverit, quot quantaque bella Romanis intulerint Germani. Totam autem de re bellica

commemorationem scriptor ita per tria\*) capita flectit, ut extrema parte de iis agat mulieribus, quae de eventu proeliorum vaticinari existimabantur atque numinum loco apud Germanos colebantur.

Inde facillime transitus fit ad rem sacram adumbrandam, qua haud scio an ulla alia post bellicam maior et memoratu dignior visa sit Romanis. Ubi vero de cultu deorum rebusque divinis, quantum scriptor ille Romanus religiones a patriis multum abhorrentes ingenio percipere poterat, satis exposuit\*\*), eadem, quam supra notavimus, arte annectit atque adiungit prioribus ea, quae sequuntur. Nam quum ad extremum de modo consulendi deos egerit, iam sic ad reipublicae administrandae expositionem transgreditur, ut prima parte de principum civitatumque consultationibus agat. Hanc morum atque institutorum partem ubi duorum capitum ambitu\*\*\*) tractavit, rem eo deducit, ut, quum antea de iure publico, quo omnes tenebantur, exposuerit, postremo\*\*\*\*) comitatus, qui non magis ad civitatem, quam ad singulos et principes et comites pertinebat, exprimat imaginem.

Ita et optime finem facit de rebus Germanorum publicis agendi et ad res privatas depingendas aptissimum struit transitum.

De domesticis autem rebus ab initio capitis quinti decimi sic orditur dicere, ut eas bellandi studio, quod supra descripsit, opponat. Ac primum quidem de re domestica universa exponit†), deinde postquam de rebus externis, aedificiis††) et vestitu†††), explanavit, tanquam aditu ad penetralia patefacto, ex adumbrato mulierum vestitu progreditur ad matrimoniorum severitatem††††), liberorum educationem, propinquorum et hospitem conditionem†††††) praeclarissimis verbis depingendam, qua re et Germanorum et sui ipsius egregium atque immortale posuit monumentum.

Inde jam tanquam ex primaria eademque media parte oratio deflectit ad res minores. Iis enim, quae ab altero et vicesimo capite usque ad septimum et vicesimum leguntur, de vita quotidiana, de delectationibus atque ludis, de servis et libertis, de re familiari, denique de iis, quae extremae rerum humanarum conditionis sunt, de funeribus et exsequiis mirum in modum concinne et graviter agitur.

Atque haec quidem de ea libri parte, qua de universa Germanorum gente agitur; alteram vero partem, qua singulae nationes et recensentur et depinguntur,

\*) Cap. 6. 7. 8. — \*\*) Cap. 9 et 10. — \*\*\*) Cap. 11. 12. — \*\*\*\*) Cap. 13. 14. — †) Cap. 15. — ††) Cap. 16. — †††) Cap. 17. — ††††) Cap. 18 et 19. — †††††) Cap. 20 et 21.

quum in ea disponenda scriptor ille parum artis potuerit adhibere, non est, quod persequamur. Jam enim iis, quae demonstravi, satis mihi videor probasse, miram quandam atque incredibilem in Tacito fuisse artem et disponendi res et annectendi.

Superest igitur, id quod supra denuntiavimus, ut difficiliore quosdam locos, qui in Taciti de Germania libro leguntur, in quaestionem vocemus in iisque interpretandis si quid possimus, experiamur. Consideranti autem mihi, quibus cura prae ceteris adhibenda sit, duo visi sunt vel maxime desiderare, in quibus tractandis elaborarem, quorum alter est in tertio decimo, alter in sexto et vicesimo libri de Germania capite.

Jam igitur eum locum tentemus, qui in tertio decimo capite exstat. Ibi Tacitus, postquam narravit, adolescentulos civitati probatos vel a principibus vel a patribus in ipso concilio ornari armis, haec addit, quae in omnibus fere libris editis sibi constant: „*Insignis nobilitas aut magna patrum merita principis dignationem etiam adolescentulis assignant; ceteris robustioribus ac iam pridem probatis aggregantur. nec rubor inter comites aspici*“. Unus, quantum video, Franciscus Ritter, paucorum codicum manu scriptorum auctoritate motus, recepto vocabulo *dignationis* praetulit *dignitatem*; Fridericus autem Haase, Ernestii illius exemplum secutus, „*ceteris*“ in „*ceteri*“ mutavit. Haec de scripturae discrepantiis sufficiant. Mutationem enim Friderico Haase probatam infra tractabimus; eam vero scripturam, quam Franc. Ritter praefert, in locum interpretandum haud magni esse momenti, continuo apparebit.

His praemissis, primum, qui sit controversiae status, videtur exponendum esse.

Georg. Henricus Walther\*) censet, „verbo adsignandi inesse destinandi notionem, ut cogites de re non statim tributa, sed in posterum tribuenda; ita „*dignationem principis (Fürstenehre)* non ipsum esse principatum“.

Gaspar. Orellius\*\*) „*dignationem*“ accipit „sensu transitivo“ et ita interpretatur: „*Insignis nobilitas et magna patrum merita efficiunt, ut principis iudicio*

\*) Cf. Tacit. op. Halis. 1833. — \*\*) Cf. Tac. op. 1846 et 1848.

„digni habeantur adolescentuli, qui in ipsius comitatum recipiantur“, quam interpretationem Waitz (Deutsche Verfassungsgeschichte p. 151) amplectitur.

Ludovicus Doederlein\*) haec habet: „nobilissimorum filii etiamsi iam adolescentuli dignationem principis habent, vim tamen ac munus principis non habent, sed plebeiis aggregati alium sequuntur, qui reapse princeps est. . . . Nec profecto credibile est, adolescentulos, h. e. pueros sedecim fere annorum, vere principes fuisse et comitatum duxisse“.

Franciscus Ritter\*\*) locum ita explicat: „Haec igitur scriptoris sententia est, principem adolescentulum cum suis comitibus sequi exemplum alius principis annis et armorum scientia praefulgentis. Qui *adgregatur*, non subiicitur, sed auctorem et ducem ita tantum sequitur, ut eius exemplo et peritia utatur“.

Restat, ut ea, quae viri docti in utramque partem disputarunt, accurate perpendamus et diiudicemus.

Orellii interpretatio haud scio an multis laboret difficultatibus. Primum enim non video, cur Tacitus haec addiderit, si nihil aliud, nisi quod Orellius coniectura assequitur, in animo erat addere; sequentia vero: „ceteris... aggregantur“ apud scriptorem et brevitatis et gravitatis dicendi amantissimum ferri plane nequeunt; nam „aggregari ceteris“, id est in comitatum recipi, nihil habet praecipui. Deinde illa interpretatio repugnat iis, quae a grammaticis de usu ac dispositione verborum praecipuntur. Satis enim apparet, vocabulo „principis“ quod ante „dignationem“ collocatum sit, maius quoddam tribui momentum; sed in ea sententia, quam Orellius ex Taciti verbis colligit, eius momenti ne ulla quidem habetur ratio. — Adde, quod in quibusdam codicibus manu scriptis, ut in Arundeliano, pro dignatione dignitas legitur, unde colligamus licet, dignationis vim l. l. ad dignitatem proxime accedere et cum ea congruere. Accedit denique, quod apud Tacitum *dignatio* teste Boettichero illo semper eandem ac dignitas vim obtinet\*\*\*). Ita nihil relinquitur, nisi ut Orellii sententiam improbemus et vocabulum dignationis sensu intransitivo accipiendum esse censeamus.

In iis autem, quae Doederlein proposuit, quamquam multa probanda sunt, id non intelligo, cur dignitas quidem principis adolescentulis concedatur, munus atque vis iisdem abrogetur. Tacitus enim nihil mihi videtur eius modi

\*) Tac. op. 1847. — \*\*) Tac. op. ed. 1848. — \*\*\*) Cf. Boetticheri lexicon Taciteum.



indicare. Huic interpretationi paene congruit sententia Waltheri, qui, quum censet, in verbo assignandi eam inesse vim, ut dignitas non in proximum, sed in posterum demum tempus tribuatur, neque in peculiari assignandi notione, neque in Taciti sermone quidquam habet praesidii.

Franciscus autem Ritter, etiamsi locum bene perspexit, id solum mihi videtur errasse, quod principem adolescentulum, quum Tacitus *ceteris* principibus eum aggregari aperte dicat, exemplum *alius*, id est unius ex ceteris principibus, sequi iudicat. Qui enim *ceteris* aggregantur, ceterorum et rationem et exempla solent imitari. Quodsi vero Doederlein et Waitz negant, „credibile esse, adolescentulos vere principes fuisse“, recte quidem de adolescentulorum virtutibus dubitant; at singulare, ait Tacitus, id fuisse in Germanis, ut ob insignem nobilitatem aut magna patrum merita ab usitata ratione recederent. Qua in re id quoque mihi videtur considerandum esse, etiam huius temporis principibus saepe usu venire, ut adolescentuli ad summam promoveantur dignitatem. Praeterea si Waitz, quocum Fridericus Haase sentire eamque ob causam „*ceteris*“ in „*ceteri*“ mutasse videtur, fieri posse negat, ut *ceteri*, qui robustiores ac iam pridem probati esse dicuntur, principum loco fuisse intelligantur, mihi videtur non satis reputasse, nihil esse impedimento, quin verba Taciti: „ac iam pridem probatis“ referantur ad eos, qui prudentiae, experientiae, probitatis dederint documenta. Id enim ab omnibus ei concedi velim, nobilitatem in principibus ut rem necessariam requirere non solitos fuisse Germanos.

Totum igitur Taciti locum sic censeo interpretandum esse: apud Germanos eum obtinuisse morem, ut ob insignem nobilitatem aut magna patrum merita vel adolescentulis (ex consensu civitatis) principum dignitas attribueretur iique in ceterorum principum civitati probatorum numerum reciperentur; neque tamen iis, quibus tanta dignitas non tribueretur, probro fuisse in comitum numerum recipi, quum in hoc etiam numero dignitatis exstarent gradus, quos princeps, quibus vellet, attribueret\*).

---

\*) Confer. Paul Roth Geschichte des Beneficialwesens pag. 12—16, quem librum doleo post confectam demum hanc scriptionem a me cognitum esse. Qui vir de rerum Germanicarum antiquitatibus bene meritus quamquam mihi quidem non eadem probavit ac sibi, multa tamen attulit, quorum, si tempus daretur, vel maxime ratio esset habenda.

Iam ad alterum locum, qui est in sexto et vicesimo capite, transeamus. Quo in loco interpretando quum viri docti in varias atque diversas partes abeant, in rem mihi videtur esse, ut primum, quid ipse de eo loco sentiam, deinde aliis quid de eodem videatur, exponam. Leguntur enim l. l. haec, quae et optimorum codicum manu scriptorum auctoritate confirmantur et a pluribus editoribus recepta sunt: *Agri pro numero cultorum ab universis in vices occupantur, quos mox inter se secundum dignationem partiuntur; facilitatem partiendi camporum spatia praebent. Arva per annos mutant, et superest ager.*

Quae ut recte intelligantur, id praemonendum esse censeo, non de rebus publicis, sed de rebus privatis, de consuetudine ex re familiari fructum capiendi hoc loco agere Tacitum. Hanc enim rationem multum valere existimo ad vocabula et agrorum et occupandi recte interpretanda. *Agri* enim non territorium, in cultorum ditionem redactum, quod apud nos: Gebiet sive: Gemarkung vocatur, sed praedia (Ländereien) esse videntur, in quibus et arva et prata et arbusta sunt. — *Occupare* autem agros non esse existimaverim potiri agris, sed capere et destinare ad culturam agros, ut fructus inde nascantur. — Vocabula: *in vices* aut *invicem*, quae in codice quodam MS. probatae auctoritatis, quem Perizonianum vocant, leguntur, non ita accipienda esse sentio, ut rem mutuum, sed ut rem deinceps agendam significant. — Vocabulo: *mox* indicatur tempus, quod consilium exercendi agros sequitur. — *Dignationem* ad singulorum cultorum dignitatem referendam esse censeo. — Iis, quae de *facilitate partiendi* leguntur, indicari existimaverim, nihil referre, si quis parvum quiddam plus minusve in partiendo acceperit. — Hactenus igitur locum ita interpretandum esse censeo: ab universis, qui locum sive pagum quendam incolant, agros in duas tresve partes distribui, ex quibus singulae secundum ordinem quendam in aliquot annos exerceantur. Quum enim stercorandi usus atque ceterae, quae ad agrorum culturam pertinent, artes a Germanis negligenterentur, id quod Tacitus ipse iis, quae in capite sequuntur, testatus est, iam res ipsa ferebat, ut in agris colendis variaretur. Nostris enim temporibus saltus atque tractus montani eadem ratione solent exerceri, cuius rei ipse exemplum deprehendi in civitate Eberbacensium, quae civitas ad radices silvae Ottoniae sita est. In hac enim civitate ager publicus (Gemeindeland, Almend) in senas denas, ni fallor, pluresve distribuitur partes, quas cives, ubi inter se partiti sint, per binos ternosve annos frugibus ita conserant, ut fruges quotannis varient, tum partes illas

incultas relinquunt, ut arbusta inde nascantur. Quae ubi exacto vel sedecim vel complurium annorum spatio enata sunt, deciduntur, stirpes autem et virgulta allatis ignibus comburuntur, ut humo vires addant. Simili ratione, ut partem agrorum colerent, partem gregibus pascendis destinarent, partem incultam relinquerent, vicissim in omnibus agris tractandis Germanos usos fuisse, Tacitus mihi videtur indicare.

Iam eo redeamus, unde discessimus. Quod enim attinet ad arva mutandi rationem, iam ex iis, quae praemisi, facile colligitur, singulos cultores in sua quemque particula arva per annos mutasse, quum non deesset, sed superesset ager, quem coli liceret. Qua in re me iuvat addere, fere eadem, quae mihi videar per hos dies excogitasse, iam antea placuisse Henrico de Sybel (*Entstehung des Deutschen Königthums* pag. 8—9).

Comprobatur autem haec loci Tacitei interpretatio, quod ita Caesar et Tacitus optime inter se conciliantur. Caesar enim (*de bello Gall. IV, 1*) de *Suevis* haec habet: *Sed privati ac separati agri apud eos nihil est, neque longius anno remanere uno in loco colendi\*) causa licet*; alio autem loco (*d. b. G. VI, 22*) de *universis Germanis* haec habet; *neque quisquam agri modum certum aut fines habet proprios; sed magistratus ac principes in annos singulos gentibus cognationibusque hominum, qui una coierint, quantum et quo loco visum est, agri attribuunt atque anno post alio transire cogunt*. Quae si quis accurate perpenderit atque cum ea, quae *Taciti* temporibus apud Germanos obtinuit, agri colendi ratione contulerit, facile inveniet, hanc aliqua ex parte esse emendatam et praebuisse ansam, unde postero tempore in privatas possessiones mutatio fieret.

Haec habui, quibus meam de loco Taciteo sententiam probarem. Quam ut ab iis, quae in contrariam partem disputantur, defendam, iam de scripturarum discrepantiis et de eorum, qui aliter atque ego sentiant, opinionibus agendum esse censeo. Ex variis autem scripturis eas, quae a recepta illa atque plurimis editoribus probata scriptura: *in vices* haud multum discrepant, velut: *vicem* aut *vice*, ne longus sim, liceat omittere. Maioris momenti eae videntur esse, quibus qui a proposita interpretatione plane abhorrent, suam quisque sententiam confirmant. Ex quibus scripturis ea, quam Ludovicus Doederlein commendat, verba: *in vicis*

\*) Scripturam enim *colendi*, quam I. C. Held probat, praefendam esse censeo scripturae *incolendi*.

exhibet. Sed haec neque codicum manu scriptorum auctoritate comprobatur, neque ad difficultates amovendas opem magnam affert. Vici enim vocabulo aut subiicitur ea vis atque notio, ut praeter aedificia in unum locum coniuncta (Dörfer) praedia quoque significantur, aut non subiicitur. Quodsi vero subiicitur, id quod non satis constat, verba: *in vicis* nihil aliud ad rem afferunt, nisi agros etiam in minimis civitatis partibus ab universis cultoribus occupari; si non subiicitur, illa verba ferri nequeunt, quod agros non in vicis, sed nisi extra vicos prorsus occupari non posse apparet.

Altera scriptura, quae haud scio an quisquam ex Taciti editoribus receperit, exhibet verba: *ab universis vicis*. Haec unius codicis MS. Bambergensis, qui et recenti manu scriptus neque satis cognitus est, auctoritate commendatur. Sed quum ei codici ceteri omnes codices, quorum multo maior est auctoritas, repugnent, non est, quod mireris, eam scripturam non solum in dubium vocari, sed etiam ab editoribus reiici. — Accedit, quod Tacitus, si ab universis vicis agros occupari dicat, non peculiarem quandam conditionem, sed talem, qualem apud Germanos usu venisse per se consentaneum erat, videtur memoriae prodidisse. Ii enim, qui hanc scripturam tuentur, occupari agros nihil aliud esse censent, nisi in ditionem quandam redigi. Agros vero non a singulis cultoribus, sed a nationibus aut civitatibus in ditionem esse redactos, per se satis et nunc patet et olim patuit.

Franciscus denique Ritter fatetur quidem scripturam: *invicem* in eo, quem vel maxime probet, codice Perizoniano exstare, sed eam improbat, quod vocabulo: *invicem* nihil aliud nisi mutuum quiddam exprimatur, „id vero narrando Tacitus planissime secum pugnet“. Quam ob causam scripturam *in vicem* mutat in scripturam: *in vicos* atque mutationis vim ita explicat: agros occupari, *vici ut fiant*. — Sed mihi quidem hanc mutationem minime probavit. Nam quum in illo commentariorum Caesaris capite (d. bell. Gall. 4, 1) haec quoque legantur: *hi rursus invicem anno post in armis sunt*, aliis autem locis, ut d. bell. Gall. 7, 85, eadem vocabuli: *in vicem* notio deprendatur, iam satis patet, vocabulo: *in vicem* non solum mutuum quiddam, sed etiam vicissitudinem quandam rerum deinceps agendarum exprimi posse. Quae vocabuli: *invicem* duplex notio si probatur, iam argumentum illud, quod ex una illius vocabuli notione ducitur, mihi videtur sublatum esse. — Emendatio autem ipsa, qua ille vocabulo: *in vicem* substituit *in vicos*, haud scio

an quidquam habeat praesidii. Nam multa quidem ab illo afferuntur exempla e Germania ipsa petita, ut cap. 20. *excrescere in artus*; cap. 17. *extendere in manicas*; cap. 45. *lentescere in picem*; cap. 46. *relinquere in medium*, sed iis non probatur, quod probandum erat. In his enim excrescendi extendendique cet. verbis inest notio quaedam aut procedendi aut promovendi; quae si desit, fieri posse, ut verbis praepositio *in* cum accusativo adiungatur, equidem negaverim. Quam ob rem lectio: „*agros occupari in vicos*“ mihi videtur ferri non posse.

Restat, ut de iis pauca addam, qui contendunt, Tacitum, quum fixas Germanis sedes fuisse tradat\*), repugnare scripturae nobis probatae: *in vices*. Fieri enim non potuisse, quin ii, qui agros *in vices* occuparent, mutarent et ipsi sedes suas. Sed agros *in vices* occupare et sedes mutare idem non est, sed magnopere differt. Quod si quis dubitet, requirenti ei magna documentorum, quae multis locis ad hoc tempus exstant, non deerit copia\*\*). — Sunt quoque qui dicant, iis, quae apud Tacitum in quinto ac vicesimo Germaniae capite de servorum conditione legantur: „*suam quisque sedem, suos penates regit; frumenti modum dominus aut pecoris aut vestis ut colono iniungit*“, impedimento esse, quominus illa: „*agros in vices occupari*“ probari possint. Sed ipse Tacitus testis est, facilitatem partiendi camporum spatiis praeberi. Quodsi vero ad liberos homines haec partiendi facilitas pertinuit, iam nemini dubium esse potest, quin dominis haud minor fuerit facilitas agros sibi destinatos servis dividendi.

\*) Cf. Germ. cap. 46. — \*\*) Cf. Sybel, Entstehung d. Deutschen Königthums pag. 9.